

本朝分省人物考

人物考卷之八十一目錄

湖廣長沙府

陳寧

陳南賓

彭友信

陳謙

劉三吾

夏原吉

易先

顧成

曹弘

夏瑄

賀宗

王偉

羅琥

劉端

李東陽

劉憲

羅鑑

夏崇文

羅安

黃寶

陳廷璣

袁經

徐廷用

譚玉瑞

楊志學

易舒誥

張治

楊守謙

周采

魏煥

唐震

施溥

邵敏

補遺

李邦興

周之屏

湖廣寶慶府

劉必榮

梁德遠

于子仁

方觀

楊海清

楊廷芳

唐鳳儀

康憲

陽益

賀冕

李原暹

補遺

康信

本朝京省人物考卷之八十一

湖廣長沙府

六

陳寧

陳寧初名亮茶陵人元末爲鎮江小吏從軍至金陵  
代諸將言事英辯疊出高皇帝異之賜名寧授江  
南行省掾吏歷中書省叅議凡朝廷制度咸預稽詳  
吳元年出知廣德歲大旱奏免租弗允寧躬赴闕上  
言大災民饑催租太急是爲張士誠驅民也上曰  
爾乃瞻言爲此言耶竟從之遷浙江按察使洪武  
元年召入爲司農卿遷兵部尚書二年出知松江府

復拜中書省右丞三年又出知蘇州府遷浙江行省  
叅知政事復召爲御史中丞六年同宋濂拜甘露之  
賜一日率侍御史商暲等入奏 上御東閣免冠而  
櫛遣人止之移入便殿櫛已正冠方召見其以嚴見  
憚如此九年八月同汪廣洋糾奏韓國公李善長略  
曰善長位爲太師爵以上公禮命之榮冠乎文武子  
祺復尚公主顧乃佯爲愚顛孤恩失禮請置刑典以  
致厥罪於是善長父子徒跣待罪 上命釋之尋加  
寧爲榮祿大夫晉御史大夫

陳南賓

陳南賓名光裕以字行茶陵人少讀書負俊名而操  
行慤雅元末授全州學正洪武二年應賢士聘至京  
師一時名儒學士如張以寧輩皆折節與交除無棣  
縣丞轉膠州同知所至以教化爲先南賓老成有文  
學以經術飭吏事時稱醇儒十八年拜國子助教入  
見 高皇帝命之講洪範九疇反覆辨析意甚詳明  
上大喜曰此天下善講書者也御書其姓名于殿  
柱以褒之其教國子尤善訓迪窮日授受無惰容二  
十二年擢蜀府長史時蜀獻王好學禮士於玉牒中  
最號賢王然南賓猶隨事規諫王甚敬禮之造安車

以賜復爲構第名安老堂學士劉三吾記之二十九  
年四川鄉試應聘與漢中府學教授方希直同爲主  
考官所取皆名士論者稱焉及卒年八十南賓作詩  
清勁有法在蜀題詠最多蜀人傳誦之

彭友信

彭友信攸縣人洪武初以貢至京遇上於微行處  
上口占虹霓詩二句云誰把青紅線兩條和雲和雨  
繫天腰命續之信應聲曰玉皇昨夜鸞輿出萬里長  
空駕彩橋上大悅問其籍命翌晨候於竹橋同入  
朝信如言候久弗至遂失朝止召臺殿前問故具



以實對 上曰此秀才有學有行命爲北平布政使

陳謙

陳謙茶陵人洪武庚戌任瀘州知州初瀘屬潼州後屬重慶民稱弗便謙三疏之乃改隸藩司瀘地廣旱荒無備謙於鄉村立舍倉民以不饑九載秩滿民請于朝留復任三年其在官惟以蒼頭一人自隨及卒於官視其篋惟青布袍一襲大明律一部米數升而已遂葬于瀘民至今祀焉

劉三吾

劉三吾名崐孫以字行茶陵人兄耕孫壽孫皆仕元

死節三吾少習舉子業元季避兵廣西行省授靖江路教授遷儒學副提舉王師克廣西乃歸茶陵洪武十八年薦爲左春坊左贊善三吾年已近老博覽善記應對詳敏屢承顧問悉多稱 旨七月戊寅 上曰天下之民豈能保其皆安朕爲天下主心常在民惟恐失所每加詢問未能一日忘之三吾曰聖心拳拳若此恩德之及民者深矣十九年三月省躬錄成初 上嘗命儒臣編集歷代帝王祭祀祥異應感可爲鑒戒者萃爲一書名曰存心錄又命三吾編集漢唐以來災異之應於臣下者別爲一書名曰省躬錄

至是頒行之十二年二月甲辰御注洪範書成遂命  
三吾撰序二十二年陞翰林學士二十三年正月吏  
部侍郎侯庸劾三吾等在職怠惰宜黜降別用 上  
曰儒臣不任劇事令教國子降三吾爲博士未幾復  
職時洪武正韻頒行已久 上以其字義音切未能  
盡當命翰林院重加校正三吾言太常博士孫吾與  
所編韻書本宋儒黃公紹古今韻會凡字切必祖三  
十六母音韻歸一因以其書進 上覽而善之賜名  
曰韻會定正詔刊行之十一月高麗貢玳瑁 詔分  
三吾與侍講學士葛鈞十一月 上御武英殿觀書

至惠迪吉從逆凶乃曰凡人罹凶咎無不自已求之者彼事勢窮促冀求苟免竟亦何益三吾曰如是者當聽乎天 上曰心無所愧可聽於天若其自求於天何預二十五年二月 上曰朕老矣太子不幸至於此命也朕第四子賢明仁孝英武似朕欲立爲太子何如三吾進曰陛下言是但太子天下本若易之置秦晉二王於何地 上不及對但大哭而罷十二月自陳婿戶部尚書趙勉夫婦坐贓罪皆緣素失教致負深恩今雖蒙宥自當引退遂免其官未幾復爲翰林學士二十七年正月辛巳 上退朝謂三吾曰

自古先王之治必本於愛民然愛民而無實心則民必不蒙其澤民不蒙澤則衆心離於下積怨聚於上欲國家不危難矣三吾曰陛下之言及此天地神人之福也七月巳酉上因改定書傳謂三吾等曰朕每觀天象自洪武初有黑氣凝於奎壁今年春暮其氣始消文運當興爾等宜考古證今有所述作以稱朕意於是禮遇諸儒甚厚各賜以綺繒衣被又御製詩命次韵和之朝參則列於侍衛之府燕享則坐於殿中仍以朝鮮所貢玳瑁筆賜三吾及修寰宇通志書禮制集要成俱倍加賞賚二十九年八月頒表

箋文式於天下先是天下諸司所進表箋多務奇巧  
詞體駢麗 上甚厭之乃命三吾等撰慶賀謝恩表  
箋成式頒天下令諸司凡遇賀謝恩如式錄進三十  
年命三吾主考會試北士偶黜竟以是獲罪下獄三  
吾爲人慷慨坦夷不設城府自號曰坦坦翁至於大  
節則屹乎其不可奪所著有坦翁集十二卷傳於世

夏原吉

夏原吉字維詰湘陰人鄉薦遊太學選入禁廡書誥  
授戶部主事尚書郁新奇之與商確諸司事劉郎中  
者忌之會勘諸司怠事者 上曰可宥新請必罪

上怒新問誰教汝新免冠謝得已劉郎中因奏果有  
人教尚書以奏者 上問新爲誰對曰堂後書算生  
教臣臣愚過聽萬死 上下書算生獄劉郎中奏原  
吉專尚書柄前事實原吉教尚書言 上曰聞原吉  
能佐尚書汝顧欲陷原吉耶劉郎中與書算生皆棄  
市建文君卽位逾月陞戶部右侍郎明年充採訪使  
巡福建未幾移鎮蘄州靖難後轉左或言吉建文用  
事人不宜大用 上曰原吉忠於 太祖以故忠於  
建文又豈不忠朕耶逾月進尚書永樂元年吳浙大  
水命吉往治且命僉都御史俞士吉賜以水利集累

遣侍郎李文郁大理少卿袁復陝西叅政宋性佐之  
吉言浙西諸郡蘇松最居下流常湖嘉三郡上山高  
多下少環以太湖綿五百里納杭湖宜歛諸由水注  
澱山諸湖入三泖鎮浦港湮塞匯流漲溢傷害苗稼  
拯治之法宜浚吳松諸浦港泄其壅淤以入于海此  
卽禹貢三江入海之跡俟既開通相度地勢各置石  
閘以時啟閉每歲水涸時修圩岸以禦暴流 上從  
之役夫凡十餘萬吉布衣徒步日夜經畫盛夏揮蓋  
去日衆赤體暴日中吾忍張蓋乎歲饑奏發粟三十  
萬石賑濟還朝復出治水水洩農田大利召還時賞



功封建征夷下番營北京費億萬計皆取辦于吉從  
上北巡兼掌行在吏部兵部都察院事八年上

北征輔太孫留守北京總理行在九卿事諭曰朕以  
房玄齡視卿吉且入朝獨近扈前叅決機務朝退即  
官御史環請事吉口應手判不動聲色駕還北京尋  
令侍太孫周行鄉落取蠶黍進太孫曰願殿下味此  
知民艱苦九年考滿宴便殿諭廷臣曰原吉高皇

帝養成賢德欲觀古名臣此其人矣命與姚廣孝監  
修國史十一年扈北巡侍太孫居上營後十四年侍  
太孫還南京十五年從幸北京十八年宮殿成命

召太子太孫于南京十九年三殿災詔求直言言者  
輒云都北京不便主事蕭儀言尤峻上怒殺儀曰  
吾與大臣密議數月言遷都便言官遂劾諸大臣  
上跪言官大臣午門難遷都利害都御史陳瑛罵言  
官白面書生不知大計上令左右問衆議云何吉  
曰臺諫職言路且應詔陳言臣等備員大臣不能恊  
贊大議臣等萬死罪再問對如初上說盡釋言官  
大臣上御便殿闕門每召之語移時左右莫得聞  
退則恂恂若無預者交趾平上問陞賞孰便對曰  
賞費于一時有限陞費於後日無窮上從之法王

孫朝

上欲郊勞吉以爲不可法王見便命吉拜又

不肯拜

上笑曰卿欲效韓愈耶過侍郎楊勉之遠

矣十九年

上議征虜吉力諫

上怒繫內官監籍

其家竟北征阿魯台及元良哈明年又征阿魯台又  
明年北征還至榆木川不豫顧左右曰原吉愛我

上訃至太子走吉繫所呼之哭曰楊榮至父皇賓天

矣吉伏地哭不能起太子召問國事吉言方今民力

竭于東南戎伍疲于漕運宜幸南京少蘇民困太子

卽位復吉戶部尚書會母喪乞終制 上曰卿老臣

宜共濟艱難卿有母我無父乎如卿辭職朕亦不當

在此不允太子立兼太子少傅尋進少保兼太子少  
傅尚書如故支三俸固辭許辭太子少傅俸洪熙元  
年冬無雪 上作憂民吟授吉和手勅欲除鬱割鞭  
背連坐妖言誹謗之刑吉與二三大臣密議聞 上  
從之賜田五頃建第兩京李時勉廷諍激 上大怒  
言時勉當朝辱朕吉言時勉小臣豈能損聖德願少  
霽天威下法司議罪未晚太子去南京 上崩 昭  
皇后命吉急迎太子太子將至羣臣郊迎 后留吉  
佐襄王居守太子既即位時時密咨或袖小扎付吉  
吉亦時時有所白宣德元年漢庶人反指吉徵赦租

爲奸臣首 上夜召諸大臣議吉免冠頓首曰臣罪  
當死 上曰彼借卿爲兵端耳命坐屏左右密議東  
楊首勸親征 上難之顧吉對曰往事可鑒臣見所  
遣將語臣兵事輒泣臨事可知兵貴神速卷甲趨之  
所謂先聲有奪人之心也榮言是 上意遂決師臨  
城庶人猶令人繞城罵吉三年賜範金銀印曰含弘  
貞諒曰謙謙齋曰後天下樂從巡邊還 上念吉老  
勅輟部務俾專論道左右明年夏召郭資代吉是冬  
從閱武郊外吉生日 上繪壽星圖爲詩賜之五年  
春卒贈太師謚忠靖

易先

易先湘陰人永樂初由太學生高等授交趾諒山知府多善政民夷信服秩滿還郡民詣巡臺乞留特命復任進交趾按察使仍治諒山宣德初交趾賊黎利攻陷諒山城先嬰城固守糧盡闔家同死事聞遣官諭祭追贈廣西右布政

顧成

顧成字景韶湘潭人少有膂力喜習武事高皇帝起兵滁陽成箠馬策投謁上喜其勇漸親遇之命隸大將軍麾下以勇選爲帳前親兵執繳蓋侍出入

忠謹未嘗有過初授百戶從諸將征伐陞金吾衛副  
千戶帶刀宿衛扈從征陳友諒舟膠於淺成獨奮躍  
以背負舟而行陞堅城衛指揮僉事平蜀貴州破洞  
蠻克普定西堡陞昭勇將軍普定衛指揮使賜金帶  
晉鎮國將軍貴州都司同知初征雲南成鎮普定搯  
其後路人無敢叛陞驃騎將軍右軍都督僉事佩征  
南將軍印鎮貴州 文皇帝舉兵靖難成率衆來禦  
被執入見 上命解其縛慰諭之令侍 皇太子居  
中凡節制號令悉出其謀 文皇帝已正大位進侯  
爵仍鎮守貴州永樂二年招降貴州蠻六年討平谷

哀牢地諸蠻八年思州臺羅寨酋長苗普亮等復叛  
命成討之進兵擣其寨擒普亮斬之并戮其衆諸蠻  
震懾還師至鎮卒追封夏國公賜謚武毅成容貌魁  
偉質直有膽略涉書史大意雖至大將不以富貴驕  
人在鎮日繕甲兵申嚴號令威信並行蠻夷作生祠  
祀之及卒吏民哀慟子八人統普定衛指揮使勤貴  
州衛指揮同知統先卒

曹弘

曹弘字文淵益陽人永樂乙未進士歷刑部員外郎  
恭慎潔清詳讞明允累遷刑部右侍郎巡撫淮南鎮



靜不擾軍民懷之卒于官篋中無長物惟衣二襲帶  
二束而已

### 夏瑄

夏瑄字韞輝湘陰人原吉次子少穎敏喜讀書嘗竊  
觀忠靖奏草及忠靖朝退必請問所議事忠靖笑曰  
是非爾所知也然心默喜之胡濙嘗夢 上以櫻桃  
一盤賜忠靖二子長子琉避不敢受而瑄獨受賜後  
琉卒胡以告忠靖曰繼夏氏者必此子也 仁廟嘗  
顧問忠靖曰卿子年幾何欲以近侍官之忠靖曰臣  
子幼稚非食祿時俟成立事 陛下未晚也宣德五

年忠靖薨 宣廟震悼不已卽日遣中官致命于家  
拜瑄尚寶司丞明日瑄與叔父原禮入謝時瑄年甫  
十有三進退有度特賜冠帶衣服瑄扶柩歸鄉里  
宣廟憫瑄幼特免守制使養母于官而別遣官護喪  
歸且厚恤其家瑄強記過人太師張輔呼爲小友少  
師蹇義而下多瑄父執咸禮重之正統初 英廟追  
念忠靖勤勞特賜瑄田十八頃而蠲其稅楊文敏榮  
將歸謂瑄曰尚寶非處君地吾還當薦君未幾楊卒  
不果雲南夷逆命瑄上疏乞立功自效尚書王驥奇  
之欲以瑄往有沮者乃已八年命署尚寶司事瑄以

母疾乞侍養還鄉母愈乃就職時四方多事瑄上疏  
陳七事詔亟行之後虜使至瑄又言虜無故遣使與  
吾譯者偕來必佯爲遜辭以緩我應援揣我進退覘  
我虛實或爲誑事虛情以亂我謀或賂我譯者令爲  
反間宜慎防之以觀其變又謂虜若引退宜分兵五  
路間道襲之以正兵二路當其前以奇兵二路攻其  
傍以伏兵一路絕其後又以宣府大同諸路邀其歸  
蓋彼方恃強不虞吾至且待使回犯我而我先奪其  
心勢必可破當道不能用其言瑄又言虜旣得利今  
冬來春必圖再寇今汝寧鳳陽諸府及河徙故地流

移之民無慮百萬恐因隙而動爲患不淺願假臣便  
宜使招募智勇以爲國用仍條陳事宜下兵部尚書  
于謙請試用其才侍郎王偉瑄知已也時爲監察御  
史亦請勅瑄募兵淮揚會事定不果久之瑄以母老  
乞就養金陵命掌南京尚寶司事三月丁母鄭憂上  
京師復陳三事大學士高穀見瑄疏薦于朝亦不果  
用奉使秦府充冊封副使凡所賜遺悉不受天順二  
年以疾請命掌南京尚寶司事踰月遷少卿八年賜  
誥命特贈所生母王爲夫人成化二年進爲卿時五  
府多闕惟都督一人瑄奏守衛事重非一人可任乃

命四都督往更宿衛十四年載考最陞南京太常寺少卿仍掌尚寶司事方圖請老歸守先墓疾卒訃聞上遣官祭于南京

賀宗

賀宗湘鄉人宣德庚戌進士授大理評事嘗疏言湘鄉田稅增重歲遭水潦民苦徵輸請減十分之一以紓疲民上從其請湘人賴以甦息正統間浙寇起宗畫策討平之

王偉

王偉字子英攸縣人隨父伯靈謫戍宣府年十四

宣廟北巡獻安邊頌命補保安州學生員舉正統丙辰進士改翰林院庶吉士授戶部主事甚有時譽正統己巳北虜犯順命偉行監察御史事糾集民壯守廣平選兵部職方司郎中時邊圉多事文移填委援筆立就皆中機會少保于謙專任之引使佐已擢兵部右侍郎命出視邊常密具方略以上虜有小田兒者本中國人降虜虜爲邊患多出其計偉受謙密計至陽和城見其隨虜入貢行差後伏勇士于道執而斬之給虜曰彼思其親亡去矣自是邊患稍息天順初偉爲石亨所搆免官歸成化三年復召爲兵部右

侍郎初亨構于謙等黨逆鏤板榜出示天下至是傳以爲言乃并毀之五年以病乞歸命還家養疾疾已復來道濟寧卒五十三賜祭葬如例

羅 琥

羅琥茶陵人正統中通判南陽捕盜縱被誣者五人積粟麥三十萬石撫綏流民萬餘戶築封丘隄八十餘里改衢州以擒賊功進南京戶部郎中會尚書缺署部事諸司咸祇令焉

劉 端

劉端字本正寧鄉人生母鄧蚤世幼事父濟以孝聞

天順己卯領鄉薦授潮州府同知聞父訃卽匍匐歸  
被髮徒跣數日不食治葬遵古禮廬墓三年不履城  
郭服闋改西安府開涇陽廣慧渠鑿石引涇水溉五  
邑田七千頃民立生祠祀之致仕歸囊無贏帛而時  
享必豐潔事聞旌表其門進階朝列大夫所著有東  
岡集

李東陽

李東陽字賓之茶陵人曾祖文祥以戎籍隸金吾遂  
居京師東陽早負奇氣四歲能大書景皇帝召見  
抱置膝下賜以上林珍果及寶鏹六歲復兩召之試



講尚書大義命肄業京庠天順壬午年甫十六舉順  
天鄉試甲申登二甲進士第一選庶吉士授編修甲  
午轉侍講癸卯進侍講學士甲辰充東宮講讀官  
弘治己酉遷左庶子兼侍講學士辛亥預修憲廟  
實錄成擢太常少卿仍兼前職掌翰林院事充日講  
官尋擢禮部侍郎兼侍讀學士典誥勅乙卯命兼文  
淵閣大學士預機務時安南侵占城國奏請命官往  
問上欲從之東陽疏諫宜勿聽中官李廣以燒煉  
齋醮被寵東陽上疏極諫時武岡知州劉遜逮繫科  
道會奏上震怒俱下獄東陽上疏救之上爲霽

威召至平臺奏事始復舊制因東陽之諫也戊午加  
太子太保禮部尚書五月復召問親定團營總兵官  
九月清寧宮災東陽疏奏近年災異頻仍內府尤烈  
或者以天變不足畏禍患不足慮以齋醮祈禱為彌  
災縱囚釋罪為修德熒惑聖聽莫此為甚且賄賂公  
行賞罰失當紀綱廢弛賢否混淆工役繁興軍民困  
憊下情不達上澤不宜愁嘆之聲上干和氣災異之  
積正此之由越二日有為李廣乞祠額者又欲召能  
仁寺僧入大內慶讚東陽屢執奏以為不可上但  
從之甲子命祀孔子于闕里還朝上時政疏命有司

議行乙丑 上不豫召入受顧命 武宗登極加光祿大夫柱國兼太子太傅戶部尚書謹身殿大學士丙寅東陽上疏諫視朝太遲免朝太多奏事漸晚嬉遊漸廣等事言極剴切不聽復上疏曰 先帝顧命惓惓以 陛下爲托臣痛心刻骨誓以死報邇者羣災疊異併在一時歷觀載籍徧閱古今未有如此而不亂者且詔令廢格變易殆盡憂在于民生國計若罔聞知事涉于近倖貴戚牢不可破或旨從中出略不用國武有所擬議徑行改易臣若諉顧命之名不盡輔導之責天下後世其謂臣何不報又上陳政令

十失 上下諸司議革之尋加少師兼太子太師吏部尚書華蓋殿大學士丁卯劉瑾擅權適尚寶卿崔璿御史姚祥主事張偉爲邏卒誣執荷校長安門外東陽上疏力救之命戍邊時聞內苑御船獵獸復上疏切諫不聽戊辰六月給事中安奎御史張或忤瑾被罪及都御史楊一清逮繫至東陽屢疏力救之是月早朝有投空名文書數瑾罪者 上疑羣臣所爲悉逮詔獄東陽又力救之庚午六月旱霾東陽條上寬政四事一曰寬逃軍拐馬之罪二曰寬僉書職員之罪三曰寬盤查糧草之罪四曰釋官校羅織之罪

疏上會慶府寘鑄叛命太監張永同都御史楊一清  
討平之師旋獻俘永發瑾奸狀 上卽命擒之以東

陽有反正功加特進左柱國廕其從子兆蕃爲尚寶  
司丞東陽復上疏切諫言 高皇 文皇創業定鼎  
之艱難 列聖相承之罔怠以及 先帝顧命 聖

慮之深遠惟欲帝思祖宗授受者隆體生民仰賴者  
切每于朝奏講讀之暇安處官闈溥施恩澤起居以  
節游豫以時保養天和培植國本則六氣莫能侵百  
邪不敢近矣不報時巨寇劉六等衆至數萬東陽晝  
晝宵籌卒致底定加廕一子爲錦衣指揮上疏力辭

上以京軍不習戰陣欲調邊軍入衛京師東陽上  
疏陳其十不便狀不聽遂乞休賜之勅詞旨優渥仍  
廢其從子兆延爲中書舍人卒年七十贈太師謚文  
正所著有懷麓堂稿

劉憲

劉憲字廷式益陽人成化戊戌進士拜監察御史歷  
陞僉都御史巡撫寧夏值北虜入寇憲募土兵禦之  
于花馬池捷聞賜金帛有差後忤逆瑾逮繫詔獄卒

羅鑑

羅鑑字緝熙茶陵人成化戊戌進士授南京刑科給

事中弘治紀元鑑 上疏言隆輔養保初政廣儲蓄  
三事皆切時弊 上嘉納焉擢廣東叅議累轉四川  
布政使所至均賦役練戎政撫孤獨不爲赫赫名而  
人被實惠進副都御史督蘇松糧儲會逆瑾索賄不  
遂落職瑾敗起撫蘇松尋致政歸

夏崇文

夏崇文字廷章湘陰人太師原吉之孫尚寶卿瑄之  
子也成化戊戌進士授南京吏部驗封司主事歷員  
外郎中陞通政司左叅議太僕寺少卿進右通政未  
幾卒崇文雖宦家子然有文學端雅清朴爲士林所

重 孝宗踐祚羣臣爭言事進士李文祥以忤執政  
謫咸寧丞崇文上疏救之名益著是後愈慷慨論天  
下事際 孝宗之明多見採行然其言每每傳以家  
庭舊聞 祖宗成憲體驗平實有自不能廢者

羅 安

羅安字時泰益陽人成化戊戌進士授戶部主事使  
兩廣以清幹名監澧石督糧中貴不能干僉憲山東  
舉屯政毀淫祠轉四川副使夷酋安鰲者兇虐懼罪  
以金賂安安揮而誅之中貴採玉蜀地擾害安奏罷  
濫人祠之尋陟江西按察使寧藩校虐民痛繩以法



或銜之改貴州叅政會普安兵起安督餉有功拜金帛之賜

### 黃寶

黃寶字廷用長沙人高祖興輔洪武初爲監察御史寶登成化甲辰進士授吏部驗封司主事歷文選司郎中懸水鑑勵冰蘖風節凜然遷太常少卿修舉禮樂正德初累擢都御史巡撫陝西時潼關以東民如縣罄花馬以南虜多陸梁近邊城堡復多起廢羽檄旁午倉卒不可爲備寶深思其患力以處之迺肅紀律清壁壘豫餽餉遠烽燧恤災沴屏黠猾猶恐北虜

西戎互相援應建議斷其右臂抗其中吭以犄角之  
故河套虜酋莫我敢犯而秦地用寧值逆瑾柄國罷  
歸瑾敗復起巡撫山東不踰月移疾歸卒

陳廷璣

陳廷璣攸縣人性孝友富於吟咏凡天文地理諸書  
無不通曉隱於朝天峰下成化十九年母宜人彭氏  
卒哀毀柴立負土築坟結廬墓側居三年悲號不已  
致有靈芝烏鵲馴虎死狸之異成化二十一年知縣  
陳鉞以其事奏聞弘治元年復應詔膺薦赴吏部考  
未及授選而卒所著有天峰樵唱詩集等十餘卷

袁經

袁經字大綸長沙府寧鄉縣人弘治庚戌進士授西  
安府推官陞監察御史按兩淮三吳有風采歷山東  
按察司僉事陝西副使山東按察使正德辛未陞右  
僉都御史巡撫遼東練兵恤士摘奸剔弊頗有能聲  
尋調巡撫大同道病卒如例賜一祭

徐廷用

徐廷用字良佐醴陵人弘治癸丑進士授戶部主事  
督收諸倉場芻稅剗剔奸蠹人莫敢于以私有中官  
同事者暮投數十金于地而去廷用晨起出其金焚

香集部吏矢之曰予不德金乃至吾門耶如貪賄害  
民有如此日亟還之宜大舉兵以廷用佐理軍餉區  
畫有方邊事克濟進郎中諸司奏牘多所屬草素有  
疾在告猶手削奏牘矻矻不少置廷用敦尚儉素旣  
卒無以爲歛所著有素齋稿東曹奏牘

譚玉瑞

譚玉瑞字暉祥茶陵人弘治癸丑進士任行人進司  
正性坦直處困無戚容居官簡約狷潔妻子僅足自  
給無私蓄也奉使寧藩絕餽遺至居家睦族置義倉  
設祭田內外稱之

楊志學

楊志學字遜夫長沙人繫籍彭城衛弘治癸丑進士授戶部主事轉員外郎郎中出補知府歷陞都御史巡撫大同值邊卒桀傲屢戕主帥驚疑勿靖志學感以至誠士如挾纊召入爲戶部侍郎陟尚書扈從聖駕大狩輿都督餉免租民蒙其澤子守謙守約守魯俱中科甲

易舒誥

易舒誥字欽之攸縣人弘治乙丑進士改翰林庶吉士授檢討詞翰冠絕當時逆瑾怙勢人爭附之舒誥

獨不屈出爲南京戶部主事衆爲憤惋舒誥獨處之  
晏如也瑾敗復入爲翰林聲稱籍甚尋以親老乞歸  
養杜門却掃娛親之外日事吟咏而已

張治

張治字文邦茶陵人性稟英毅學覽淵博自少以經  
濟爲心正德庚辰會試第一人改翰林庶吉士授編  
修左贊善時議征交南選使往諭僉謂無以踰治進  
學士累遷吏部左侍郎署翰林院事陞南京吏部尚  
書入爲文淵閣大學士進太子太保預機務方是時  
世宗日在西內躬修玄典召諸輔臣入直撰科書

忽忽不樂輒形之詞色未幾以病卒治性褊急而  
志意慷慨議論侃直兩典鄉會文衡號稱得人尤喜  
汲引善類其於權貴視之漠然不肯阿附以固祿位  
用是佐政未久士類悼之卒賜祭葬謚文隱隆慶間  
改謚文毅萬曆初改謚文肅

楊守謙

楊守謙字允亨號次村長沙人七歲授書善屬文器  
苟疑重若老成人稍長爲舉子業卽以古豪傑自許  
講說經濟敦忠孝大節嘉靖戊子舉於順天己丑中  
羅洪先榜進士授工部屯田司主事尋改兵部職方

司歷陞本司郎中 世廟南巡扈從車駕還賜綵幣  
陞陝西按察副使丁父憂服闋除陝西督學副使校  
士至公雖窮邊下邑亾不身歷章縫興起至今思之  
祀于名宦秩滿陞本省叅政未履任卽陞右僉都御  
史奉勅巡撫山西尋改延綬延綬胡虜咽喉西北重  
鎮邊垣稍卑虜每毀之而入謙爲增高厚數倍益置  
敵臺戍堡虜萬衆仰攻不能入數獻捷 天子喜悅  
錫賚無算庚戌春陞副都御史巡撫保定去延之日  
軍民老幼祖送至數百里咸呼曰楊公在邊虜不敢  
正視西人高枕卧一旦去我劇虎牙無日矣甫蒞保



文屬北虜大舉入寇圍者城中列刑巖援兵符無至者謙投袂起曰虜薄都城主上拊髀人情洶洶爲臣子安忍坐視卽率部下精兵三千入援世宗皇帝聞勤王兵至大喜卽降旨楊守謙提兵入援忠勇足嘉其陞兵部侍郎仇鸞有寵於上謙督學陝西時鸞爲甘肅總兵潛與虜逆謙聞而密白之中丞御史臺事竟寢未發其後鸞知遂恨謙切齒至是譖於上曰楊守謙雖勤王實按兵觀望縱賊劫掠世宗大怒逮繫詔獄法司擬戍上愈怒罰治法司特旨坐謙棄市臨刑自若曰臣以勤王及旣讒賊之口

寶蔽 聖聰皇天后土知臣心臣死何恨臣得與岳  
武穆子肅愍同遊地下足矣無何鸞造逆未就而死  
事發詔剖棺戮尸妻子闔門斬都市先是謙之及旣  
以八月二十六日而逆鸞被戮亦適明年是月日人  
以爲天報不爽云鸞敗 主上卽悔悟謙冤至隆慶  
改元都給事中辛自修御史王好問交章昭雪謙忠  
而受冤詔贈兵部尚書謚恪愍賜祭葬廕一子忠義  
之士聞而鼓舞都城父老有泣下者爲人忠孝天至  
溥養有道燕居莊肅雖對妻孥不及於媠狎有庶弟  
二人庶妹一人悉爲鞠育婚姻事庶母宛氏若親母

兄弟同居所得祿入悉推與衆不入私橐亢厲廉潔  
一介不妄取歷官至開府大位蕭然猶寒峻恒以稱  
貸自給文章尚氣格雄渾昌大詩亦悲壯有唐人風  
尤長於經濟籌邊有大寧考紫荆考花馬池考兵部  
集謙雖以忠寃卒蒙 聖恩昭雪在順天長沙祠鄉  
賢在西安延綏祠名宦而關中士人有死入冥府見  
謙方爲貴神宮殿服御如王者獲報亦隆渥矣

周 采

固米寧鄉人嘉靖己丑進士歷禮科都給事中端雅  
沉毅入 奏務持大體出補叅政歷四川左布政使

時附和風熾采不能殉踰六年進副都御史巡撫雲南比解司篆籍耗金數萬充帑數一不問在雲南以鎮靜得民病歸卒

魏 煥

魏煥字原德長沙衛人嘉靖己丑進士授嘉興府推官歷兵部員外郎擢四川僉事貞夷簡溫不以才智自見明習當世之務所在毅然身任之留心邊防能言勝敗之故至四川力振風裁無何卒所著有九邊圖考蜀東撫夷錄 皇明拱衛錄諸書

唐 震

唐震醴陵人進士授戶部主事歷員外郎中勤廉公  
謹兩署部堂篆人以公輔期之爲三原王恕所器重  
叅議四川提督建昌六衛邊儲清慎不渝于初修城  
建堡政績顯著有土官勒馬賢者爭地殺人暮夜以  
金賂震震却之弗受設法擒捕置之法軍民咸樂業  
焉其他善政若除怪誕去淫祀不可殫述屢獲旌獎  
而越雋衛特立祠祀之以叅政致仕年八十一卒著

東軒稿

施溥

施溥醴陵人性至孝母董氏疾溥籲天刲股作羹奉

父母食之頓有起色既卒廬於墓側哀號如初喪有二鳥栖於墓樹聞哭聲輒悲鳴若助其哀者地故多鼠巾服皆爲所啣俄有猫至盡捕諸鼠磔之置墓旁而去

邵敏

邵敏湘陰人事母至孝母沒廬墓側三年一夕有虎來墓所敏了無懼色忽數鹿來逐之去墓旁產靈芝數本人以爲孝感所致成化間旌其門

補遺

李邦興

字邦興字嘉言湖廣寧鄉縣人洪武二十年監生除北平道御史陞僉都丁憂違限調補汝寧府知府建言謫口外爲民交趾叛起復僉都征討卒于途

周之屏

周之屏字伯卿號鶴臯長沙府人舉嘉靖三十八年進士授溧水令由南京吏部郎出守吉安遷河南山東提學副使廣東叅政按察使浙江右江西左布政使致仕後十餘年卒吉安故有流賊之警假浙江爲禦兵素暴與郡人士睚眦露刃入府聲如雷欲掠帑貲劫官府爲質聞報嚴鼓升座誥兵曰汝輩將有

所訴也將爲亂也訖則守能爲汝白之若爲亂則守不懼死但恐汝曹造罪深重不得見汝父母妻子矣語未絕皆釋戈額首而拜士大夫莫不謂臨事忠決有安一郡之功在南粵時江陵欲行文量有司以狹獮田不可問比入 覲藩臬郡邑合言於 朝江陵厲聲曰只管丈悟其意揖而出衆尚囁嚅江陵笑曰去者解事人也衆出以問云何曰相君方欲一法度以齊天下肯明言有田不可丈耶申縮當在吾輩方豁然少有文學之譽與新鄭江陵近及蘭溪新建俱有交逮其柄政務自嫌遠故十餘任皆平進而終



湖廣寶慶府

劉必榮

劉必榮字懋德武岡人洪武初以才能授浙江按察僉事以言事謫寧夏歷廣東提舉擢鴻臚少卿交趾黎季犛亂詔遣必榮往撫之既至季犛遠竄必榮直抵其穴季犛出迎必榮諭以朝廷威德季犛感服隨以黃綺謝悉不受還獻于朝自是凡三使又往哈嘛諸國咸稱使任

梁德遠

梁德遠邵陽人洪武乙丑進士父廷用任戶部郎中

逮繫詔獄德遠中甲科不赴瓊林宴及父謫戍上言  
請以身代 高皇帝憫其孝命釋其父拜工科給事  
中

于子仁

于子仁武岡人洪武乙丑進士事母至孝任山東昌  
樂知縣驅虎患有惠政嘗以事逮繫詔獄昌樂百姓  
赴京保留陞登州知府有登泰山歌卒于官民祠祀  
之

方觀

方觀武岡州人性至孝年十四喪母哭泣踰禮父患

痰嗽觀憂思每夕焚香籲天尋愈及卒水漿不入口者三日比葬久雨走禱羣神已而果霽負土成墓廬其側三年不御酒肉養繼母沈氏若所生沈卒遂終身廬墓墓木爲牛踐傷乃躡踊悲號牛忽自斃鼠嚙祭器觀以不善護藏自責俄一鼠跽伏祭器中不去觀舉而釋之景泰中事聞旌表其門

### 楊海清

楊海清城步人有勇力爲衆推服景泰八年洞苗肆掠邵湘海清率其妻及其徒追戰于龍王橋以後援不至與妻徒俱遇害今有祠祀

楊廷芳

楊廷芳字孟仁邵陽人天順庚辰進士性執不阿遇事敢爲歷官貴州按察僉事亡何棄官歸環堵蕭然經學不廢郡守石鳳嘗分俸以贍之人稱年幾百齡學長三絕

唐鳳儀

唐鳳儀字應韶邵陽人事親恤族內行純備登正德戊辰進士授行人拜監察御史山按蘇松浙江風裁凜然不避權勢擢應天府丞進僉都御史巡撫四川上疏救荒止征勦擒獲沙保振旅息兵蜀民大悅尋

丁母憂以疾卒

康憲

康憲字公度寶慶人幼孤事母雷曲盡其孝仕廣元知縣寬洪簡易愷悌循良興學校惠小民民愛戴若慈母九載歸田恂恂謙厚雖待小兒必以禮有非義者愧不使聞治家嚴而有法尤敦嫺睦周患急年八十四鄉評重之

陽益

陽益新化人正德間應貢奏免本縣加增稅糧邑民賴之任桐城丞督兵拒宸濠以功欽賜銀幣

賀冕

賀冕邵陽縣人有勇略嘉靖十年流賊劫掠冕率弟  
等并姪四人奮勇拒敵以後援不繼死之

李原暹

李原暹邵陽人才識遠大爲監察御史持法有能名  
終雲南按察司僉事

補遺

康信

康信寶慶府人以蔭任武岡鎮撫嘗征武開有戰功  
永樂初武開蠻叛信大破之餘黨退入靖州愈熾信

陳洪謨

冀元亨

龍翔霄

蔣信

楊英

補遺

冷謙

石瑗

本朝京省人物考卷之八十二

湖廣衡州府

鄧偉奇

鄧偉奇字子才衡州安仁人登洪武乙丑會試第一人  
高皇帝親製策試時與試者四百七十二人擢  
丁顯爲第一偉奇次之俱授翰林修撰先是辛亥開  
科以吳伯宗爲首至是始復臨軒之制偉奇天資秀  
異博洽穎敏善屬文尤長於詩是科最爲得人而二  
甲馬京爲編修吳文爲檢討三甲楊靖爲庶吉士蹇  
瑒爲中書舍人厥後俱爲名臣云



茹瑞

茹瑞衡山人洪武中貢入胄監授承勅郎累擢兵部尚書定文武官封贈之典及武官庶子襲職例悉從宋制上以瑞才能卓異并其田塘園林一切租稅悉蠲之加太子少保革除間以尚書掌河南布政司事靖難師起瑞主兵餉 文皇帝登極以瑞有征討功封奉天翊運守正文臣兼兵部尚書忠誠伯食祿一千石子孫世襲賜券重修 高廟實錄瑞爲副總裁書成賞賚優渥詔以秦王長安郡主下嫁其子鑑禮遇崇峻後致仕尋以事逮至京師卒於獄宣德初官

其幼子鏞鏞以瑋在功罪之間不敢受

李思聰

李思聰字仲謀桂陽人洪武甲戌進士授行人時緬  
酋及百夷稱兵爲亂高皇帝遣思聰往諭之思聰  
宣布詔諭緬人聽命願罷兵事竣圖其山川險要以  
獻上覽之嘉悅擢江西叅議至卽肇興貢院興學  
校事集民安沒祀于名宦

劉紹先

劉紹先衡山人洪武甲戌貢入胄監知休寧縣勤以  
蒞政賦役均平丁丑坐事免休寧耆民數千人赴闕

懇留 高皇帝嘉之復其職尋以母憂歸服闋補知  
肅州擢刑部員外郎歸躬耕衡山下有驛使問其家  
紹先適操耜在田間親指示之已乃具衣冠出揖驛  
使驚歎而去

賀讓

賀讓衡山人宣德丙午鄉薦知瀘州廉明蒞事平恕  
愛民至好惡甚嚴不苟徇時俗權勢者忌之陞思州  
知府去任之日瀘人攀號滿道留之不能得後數年  
爲立仁政坊以表去思至思州撫馭有方民夷俱安  
尋致政歸行李蕭然惟市有瀝青數石爲身後之計

而已今廟食思州

李 璽

李璽字朝用耒陽人登宣德庚戌進士授監察御史  
巡按浙江江西陝西四川卓有能聲陞浙江叅政正  
統己巳閩寇作難璽提民兵分守三衢剿賊 賜勅  
獎諭繼剿吉安強賊賜綵帛復同兵部孫侍郎原貞  
戮力攻寇賜寶鏹未幾陞雲南按察使璽至滇一新  
憲度值歲大饑璽議賑恤民賴以活考居最時鎮守  
太監羅紀總戎沐璘奏留一十三年遂以疾辭歸去  
後滇人立廟祀之 孝宗卽位推恩特進一級卒

朱海

朱海字克寬桂陽人正統乙丑進士拜雲南道監察御史擢江西按察僉事持身清白卒於官殯斂無所資子守恕剛毅廉能有父風成化壬辰進士知河南涉縣擢監察御史轉雲南僉事仕宦奕世不改寒素

歐陽復

歐陽復字時亨桂陽人景泰辛未進士歷兵部員外郎出知泉州府政平刑簡時大旱決滯囚理冤抑雨立霽遘疾郡人禱於神以祈祐者千餘人比卒哭之如喪考妣立三太守祠祀蔡尹歐陽三公至今泉民

禱輒應大學士彭時記之

曾鑑

曾鑑字克明桂陽人天順甲申進士初授刑部主事  
通州民十餘輩坐盜獄具鑑辯其誣釋之尋以父喪  
歸服闋改工部督造供應器物綜理甚密調吏部驗  
封遷稽勲員外再進郎中奏議精核人無訾議成化  
丁未擢通政司右通政領武官誥籍弘治庚戌遷太  
僕寺卿馬政修舉壬子擢工部右侍郎督易州山廠  
乙卯召還轉左侍郎修倉庾理宮掖充唐府冊封使  
庚申拜尚書修諸禁門社稷壇及京城垣墉凡涉公

帑民力者執藝以諫 上嘗召至便殿趣造戰車鑑  
言派辦不可亟請以舊所積榆槐爲之又嘗問工匠  
缺乏鑑歷陳災傷逃徙之故皆見嘉納正德丙寅脩  
虛溝橋隄特賜玉帶月餘病乞休進階榮祿大夫嘗  
著銅柱賦

謝文祥

謝文祥字元吉耒陽人登成化丙戌進士選庶吉士  
天性峭直與羅倫莊景相善遷監察御史數上封事  
直氣動臺端謫南陵縣丞李東陽劉大夏陳獻章輩  
俱壯其節贈之詩年三十七卽掛冠歸子訥弘治乙

丑進士官給事中

楊時榮

楊時榮字仁甫衡山人成化庚子以戎籍領雲貴鄉薦再試禮部不第乃歸衡山作別墅於紫峰山下名其居曰止山養晦自高不入公府未嘗以褻服出戶庭事親盡孝行誼修飭人皆重之山上有白龍潭水可灌田時榮日課僮僕耕植其中意豁如也人呼爲白龍先生云

范輅

范輅字以載桂陽人正德辛未進士授行人拜監察



御史清戎江西忤寧庶人宸濠謫四川宣撫司經歷起擢福建僉事江西副使適宸濠謀反輅首撻其樂工殺之誣繫獄除名事白復起山東副使陝西叅政輅有氣節歷官有能聲時論稱之從子鑿字汝和甲戌進士拜監察御史擢四川使

蔣福陵

蔣福陵字伯固衡陽人正德甲戌進士知鄞縣擢太僕寺丞出知臨安府公廉寬裕始終不易卒於官民昇柩歸衡悲慕而去

劉 燾

劉黻字伯繡衡陽人正德丁丑進士授行人值武  
宗欲南幸黻抗疏留駕上震怒廷杖八十謫南國  
子助教世宗登極詔復行人尋授廣東監察御史  
命巡南城屢建危言宦戚斂手繼按四川特禁中貴  
專擅復蘇氏侵田修鶴山圯院居父喪起復屢陳情  
終養繼母汪氏得請歸四十餘年母九十六歲而卒  
黻居家結茅清修公門屏跡爲當路所推重所著有  
奏議文集易經卦變童訓等刻存於家

### 朱希賢

朱希賢字茂修衡陽人舉嘉靖戊子鄉薦性至孝種

學績文自經史百家以至天象歷數奇遁陰陽地理靡不究折而尤邃于理學平生自誓欲崇廉耻重忠義敦風俗重綱常以回古昔三上春官不第輒隱居山中郡邑博士弟子員從者數百人以文行舉者甚衆學者稱爲竹山先生云

祝詠

祝詠字鳴盛衡陽人嘉靖己丑進士授戶科給事中轉兵科給事在言路七年竟以方鯁忤時倖臣請內府白糧代俸戶部許之詠疏不可擅損上供竟廢閣癸巳星變有巡撫黨執政者故指事應爲解詠應詔

力破其奸執政心銜之無所泄會甘肅諸夷入貢誣  
訐撫鎮大臣聽之懼損威咈之懼激禍朝議不能決  
乃命詠同大理少卿蔡某往驗將陰中之比驗覆詠  
以所訐坐諸夷羣小不復株連事尋解執政計沮而  
詠出入邊境目擊險易虛實之故數數論列如燒河  
套復屯田諸議又爲當事所忌乃乘其未返諷吏部  
出爲太平知府翫髒視昔不變巡按子矯虐虐民且  
挾有司爲利詠怒將執之而巡按又惡其忤已嫁不  
根語劾詠事下巡撫詠兩疏其寃竟得理左遷兩淮  
鹽運司同知未幾補贛州知府減郡供應督府憲司

無所避境多盜憲司令賞捕盜者詠誦其賊不實乃  
屏人謂曰吾知某非盜奈何枉之瞋目視捕者不能  
置對某吐實立反其獄憲司不勝忿與巡按共擠詠  
詠再引疾求去上不聽尋陞四川按察司副使備  
兵松藩時西南夷騷動詠乃兼程往視出鳥道歷林  
峒撫視籌畫條其病利與巡撫王大用意合二年松  
藩無事擢陝西左叅政疾作罷歸卒所遺有兩科奏  
疏使西漫興蜀中稿祝氏家譜葬祭禮式存於家

王萬善

王萬善衡陽人嘉靖辛酉舉廣鄉試第一衡俗喜

靡士得少進輒美衣服乘肩輿揚揚閭里間萬善獨  
折節爲儉日御布袍芒履卽風雨亦曳屐走泥濘中  
有司雅重其爲人造訪燕見萬善交際謹默更不及  
他事篤行好學澹無所營以故家事益涼薄而意度  
豁如也隆慶初劉穩會楚士於衡山論學居數日萬  
善謂人曰學不力行講何益哉遂率同志數友會石  
鼓書院相觀切劘所學皆明心體通物我達治道諳  
時務盡期于實用不肯作漫然語隆慶辛未會試不  
第歸一歲而卒年纔三十餘士林痛惜之

劉 穩

劉穩字朝重鄆縣人自幼有大人志與羣兒戲卽陳俎豆或列行陣以指使羣兒如約束焉年二十五薦於鄉卽從郡守蔡汝楠講良知之學丙辰登進士除南京兵部武選主事間復談兵出爲廣東南韶兵備僉事韶有大羅小羅故爲徭人所據有司常戒人出入販者不至則物價倍騰徭人輒歲掠于外數以警報穩至自詣其巢宣諭威德徭人感悟羅拜願受令因立徭長聯屬之民夷自是晏然薦晉兵備副使仍理南韶事屢著斬馘功蒙金綺之賜然穩體素弱而又久在兵間益憊不可支遂乞骸骨歸結廬衡山與

學徒重訂舊業有終焉之志隆慶辛未以言官疏起  
補廣西按察司副使未幾調廣東海道副使有討海  
賊功加俸一等萬曆甲戌召入爲南京太僕寺少卿  
居亡何以病卒穩性冲粹于人無所拂忤海內名流  
齒交所及鬱有令譽業將大用而天奪之壽所著山  
房漫稿家訓粵中政紀兩粵瑤訓二南漫稿易經折  
衷蒙訓藏于家

補遺

陳經

陳經字貫之湖廣臨武縣人成化十一年進士由內



江知縣選河南道御史以忤汪直謫榮經知縣陞雅州知州丁憂復除東平州陞陝西僉事卒

文林

文林字宗儒湖廣衡山人成化壬辰進士授永嘉知縣法度顯明強右拘孿值市舶太監兄弟鴟張爲民患以計擒禁之卒瘦死而風岸峻峭不與世波人多忌之後改博平益挺直自將灑脫塵網其縣齋題詠有官貧自覺身無累謀拙從教俗取憎之句政成擢南京太僕寺丞滁地佳山水歐陽文忠遺蹟所在多題詠與李東陽吳寬莊景諸公寄贈倡和幾百餘律

陞温州府知府至則平市價程徭賦使貪漁斷割群  
息咸植又明敏風生照徹幽暗元旦有人被殺死者  
其家赴愬乃禱之于神夢鷹三雛被風翻巢墮地心  
計郡有潘英者殺之訊執遂服衆稱爲神明未幾卒  
于温篋中無一温物士民多哀誄之林學術優明精  
皇極數多所自得詩學陶韋不務雕刻有文温州集

### 胡文璧

胡文璧字汝重湖廣來陽縣人弘治十二年進士由  
戶部郎中改浙江道御史巡按浙江陞鳳陽府知府  
陞天津兵備副使以按中貴忤旨下獄降延安府

檢校嘉靖元年累陞四川按察使卒

湖廣常德府

胥必彰

胥必彰字德鎮龍陽人洪武癸酉鄉薦拜監察御史善持風紀彈劾不避一時權勢震悚稱爲真御史擢福建按察僉事轉浙江叅議所至俱有聲

何穎

何穎武陵人洪武庚辰進士授峨眉知縣興革利弊吏民懷畏有失牛者吏捕得之穎察其非乃默贖於神果獲真盜風聞鄰境累官江西按察僉事

翟霖

文獻卷之十一  
劉  
程  
翟霖武陵人永樂甲午鄉貢授湖州通判巨室抗不輸賦霖以嚴慎臨之人不敢撓其法賦稅亦無逋負者竟坐事落職歸家環堵蕭然糊口不給人有餽遺非義一介不取以清白重於鄉

鄧 崙

鄧崙字惟玉武陵人永樂甲辰進士授兵科給事中數上章疏遇事侃侃不避嘗條軍務曰選將領練兵卒汰冗官犒邊軍禁邊弊止侵漁謹失機禁紀律貸貧匠徙達官凡十事士論韙之陞河間長蘆鹽運使建議鹽課利害切時病者十餘事民商便之陟兵侍

卒

馮貴

馮貴字孟敬武陵人性剛直平生以忠義自許第進士授兵科給事中彈劾無所忌陞交趾布政司叅議遭喪以酋夷黎利叛奪情理事陞本司叅政勤設方略屢著奇勛與黎利兵對敵奮不顧身力不能支乃曰忠臣事君有死無二今力屈矣當死何疑遂遇害洪熙元年贈交趾左布政使建祠專祀

文澍

文澍字汝霖桃源人成化丙戌進士歷南刑部郎中

知重慶府政尚寬平有古循吏風值歲凶發部屬米萬石以賑全活者甚衆有劇盜嘯聚山澤諭之使復業盜感其誠信隨卽解散性坦直與監司齟齬調貴州忠州卽飄然歸武陵富於問學爲詩文古澹有思致著桃源賦

劉璟

劉璟字時瑩武陵人成化丙戌進士知霑化縣勵志清苦初邑中糧芻多被奸民攬納率至逋負璟至首嚴禁戢賦用完納加意撫字民瘼稍甦尋拜監察御史出按山西憲度嚴明貪吏望風解綬去晉藩嘗訟

民奪田璟察其非是仍判還民 宗藩敬服及以代  
去士民號泣以送臺評推重

楊禧

楊禧字介福武陵人成化癸卯鄉試第一弘治丙辰  
進士選翰林庶吉士拜兵科給事中持正敢言忤逆  
瑾致仕瑾敗起遷吏科都給事中轉通政歷陞南京  
太僕卿

李顯

李顯字榮宗桃源人成化甲辰進士授戶部主事監  
榷督儲以清慎著稱性樂活靜乞改南京考功出知



南康府以惠愛爲政修復白鹿洞書院作興士類病歸人皆思之

陳策

陳策字廷獻武陵人成化丁未進士知宜興縣重厚有量政尚循良雖居劇邑阜有能聲擢拜監察御史謹於持憲論事率循忠厚出按貴州廣西二省得體歲甲子監河南試以藻鑑得人士論翕然歸之

陳洪謨

陳洪謨字宗禹號高吾武陵人謨生而體貌異常頭骨間有肉角半寸許足心有赤誌如豆穎敏尤凝重

寡言笑惟喜親書史二十二領弘治乙卯鄉薦丙辰  
進士授刑部主事轉員外郎丁外艱服闋赴京時正  
德己巳巨璫劉瑾專擅乃以母老乞便養改南京戶  
部員外郎遷正郎奉差催督蘇杭等處逋負錢糧擢  
守漳州虛心諏訪旬日卽得其蠹民老吏一二人置  
諸法人大驚服郡有巨寇林廣周負海嘯聚數千人  
屬邑歲苦爲患設策盡平之郡學樂器久壞遣人求  
泗磬請神樂觀知音樂羽士選俊民百餘人肄習仍  
刻大成樂譜傳焉一日習儀開元寺見寺後有文公  
朱先生祠已敝壞祠後有峰僧廬其下仍舊額扁爲

芝山書院乃事文公以陳北溪黃勉齋蔡九峰爲配  
又遴選庠生數十人讀書其中士習丕變郡父老相  
傳文公嘗遺一聯云十二峰送青排闥自天寶以飛  
來五百年逃墨歸儒跨開元之頂上蓋若有所待云  
守漳之二年有畬人居海濱者見有大鳥飛過遺一  
尾於水邊長七八尺五采炫煥衆以爲鳳尾拾以來  
獻命寘之庫中略不爲異後鎮守太監遣人來取荅  
以久焚之時服其雅量郡志自文公纂修之後垂數  
百年未有繼者至是復修之郡文獻始大備俗尚浮  
屠歸訟乃取呂氏鄉約諭民行之朔望親臨約所又

濬龍溪陂灌田萬頃漳人至今名爲陳公陂陞江西  
叅政漳人懷其德乃卽鄉約所建祠塑像事之適宸  
濠有異志寅僚多畏禍自營巡撫孫燧知謨特倚重  
焉擢貴州按察使隨丁內艱服闋起雲南按察使有  
十八寨夷民之亂巡撫何孟春聞謨來甚喜相與定  
謀設計督兵勤勦遂空其地捷聞有文幣白金之賜  
時鎮守太監史泰金騰分守太監劉玉貪虐無厭託  
進貢爲名搜取金寶不勝其擾謨禁所司勿得奉行  
又泰玉嚇取富軍金銀等物遠近含冤謨得其用事  
叅隨等罪之又泰家人樺生員於途訴於謨謨以大

義諷秦秦不得已付謨正法謨又上疏極言秦王之惡後俱勒回一省賴以安黔國公沐紹勳未襲爵其叔叅將崧賂權貴謀得之事下勘覆謨首抗議紹勳年已長成奪之非祖宗法不可由是衆議翕然嘉靖壬午陞山東左布政黔國公以珍異贈謨爲報堅却之過武陵疾作乞休吏部請破外官養病例以處謨荷溫旨有才識可用病痊起用之語時夏江漲決堤大水淹沒城東北鄉尤甚祖居實當其衝慮族人受害者亟買二舟各載湯粥薪米之類遣人分給族人果依棲屋脊及樹上饑寒者二日矣家人乃以一

舟濟之又以一舟分給鄰右次日水退賴得無恙癸未九月吏部復起補江西左布政甫十月陞都御史奉 璽書巡撫其地謨感激奮節裁冗費飭軍旅察奸貪除宿蠹夙夜忘疲已乃請建縣治立儒學重修白鹿洞聘致仕提學副使高賁亨主洞事以風俊彥謂先朝處士吳與弼宜得表章乃上疏請祠額祭典遂荷旨賜祠額曰崇儒以至不屈死事知府宋以方節婦伍氏皆賴表揚於時少宗伯楊廉卒於家則疏其賢請恤典又積穀至百萬石亦荷金幣之賜丁亥以太監吳猷爲張真人修龍虎觀破冒太濫爲謨所

抑訴於朝乃放歸家居己丑陞兵部右侍郎卒年八十二贈兵部尚書賜諭葬子一德由進士爲明司理任一能爲進賢令孫思育由翰林庶吉士歷官禮部左侍郎稱文獻世家云

冀元亨

冀元亨字惟乾號闇齋武陵人生有異質兒時讀書史卽慨然慕古有長駕遠馭之志喜讀古忠義傳每覽其從容慷慨殺身就義之事必擊節羨歎不已正德庚午陽明起于謫所元亨請見而師事之從之廬陵踰年聞其學以歸喟然謂同志曰夫學術一本而

已矣行誼氣節猶非也况支離于糟粕者乎爲文雅  
好奇古甚厭俗格丙子鄉試則以所聞於師友而獨  
得之身心者發淵源雄偉之論西野張公謂必楚豪  
傑也竟置優選丁丑試禮闈主司大奇之以遺二判  
弗取由是望動京師戊寅再侍陽明於贛時宸濠  
陰有異圖承命往瞰之冀得因事納規開陳大義沮  
其邪謀如其不可勸喻亦因得以審察動靜知其叛  
逆遲速之機可密爲禦備亨相見議論矛盾宸濠以  
陽明所遣舍忍遣發而毒怒不已陰使惡黨訪緝加  
害陽明聞之遂遣間道歸常以避其禍越己卯宸濠



變作旋覆於義師因仇視陽明而誣及元亨同謀在  
獄南北二十年俯仰契觀從容歌嘯守者驚歎初權  
奸江彬輩欲重禍於陽明鞠問筮楚備至元亨執義  
不屈卒免陽明於禍久之開釋命下疾作卒葬黃龍  
岡後有司命創陽明書院置王木主而以元亨配之  
居恒與蔣信論格致及程子先識仁體之說亨首肯  
之且曰顛諸子頗能靜坐苟無見於仁體稿坐何益  
其所自得亦卓然其不羣矣

龍翔霄

龍翔霄字潛之武陵人領正德己卯鄉貢性孝友自

守介潔初知蜀閬中補雲南大和縣蘇倉役相承之  
困正麗江積歲之爭以循吏稱召爲駕部郎清科稅  
革夫牌宿弊鄉人賴之出守程蕃以禮讓變易夷俗  
歸泗洲流徙之民正所司擅殺之罪德威茂著入祀  
貴陽名宦性尤好赴義喜周人之急鎮遠守袁成能  
道經武陵避疾卒爲具棺殯之償之金弗受思恩吏  
目高守仁過太和資乏不能前鬻幼女於人爲道里  
費翔霄聞之爲贖以還歲時與宗族親故語惟敦本  
尚實力學明倫爲先故弟行霄舉名儒孝子以子德  
謙貴受大田令封翔霄子德孚由舉人歷戶部郎孚

子二俱登科第著有詩文如九芝堂等集行於世所  
創有龍門大會子姓科貢不乏云

蔣信

蔣信字卿實號道林常德人生而骨相隆起神氣朗  
秀年十八充弟子員家貧餽粥常不充不少介意次  
年餼廩太守文橘菴爲比鄰聞信居身有法雖盛暑  
未嘗袒裼大稱異之會正德改元齋詔沅江縣令素  
聞信名厚贈之悉却不受年二十五始與同郡冀閻  
齋元亨論學信嘗曰釋氏只悟得一空卽根塵無安  
脚處吾輩體認天理若見得時則私意自退聽矣一

日論大學信曰知止當是識仁體冀躍然而起曰如此則定靜安慮卽是以誠敬存之五年陽明赴謫龍場寓郡西潮音閣有醫杜仁夫者攜其復春詩卷以謁陽明一見驚以爲奇遂因杜氏偕閻齋見之陽明復語冀曰如卿實便可作顏子矣信偶疾借寓道林寺以一力自隨閉目跣足默坐澄心晝夜不就枕席一日忽香津滿頰一片虛白炯炯見前冷然有省而沉疴已脫然去體矣嘗謂吾平生學問多自貧中得之戊寅年十月遭母憂比葬世俗時日方向拘忌之說一切不用惟擇土色黃燥處以大統曆所載吉日

行事人以爲異而信斷然不疑嘉靖癸未信應歲貢  
赴京師始謁湛甘泉于邸舍因呈平生見處甘泉歎  
曰楚冲有是人耶遂留與論聖學精義凡數日而歸  
歲丁酉省甘泉于南雍遂入太學甘泉以學者須先  
識仁論試諸生信所作獨契其旨海內之士問業甘  
泉之門者甚衆則以屬之信信簡易和平人有不之  
甘泉而遂之信者丙戌歸自太學居道林里丁亥再  
入太學戊子信年四十六中應天府鄉試壬辰登進  
士第觀政戶部八月授戶部主事尋奉差督解軍餉  
于陝西往時督解者利其羨餘臨兌輒爭較不已信

以部原封付所司兌收之取足以竣事而已丙辰春  
陞車駕司員外郎冬陞四川按察司僉事丁酉春赴  
任播州土官循常套以金餽於途叱去之其地舊有  
關堡戍守久廢苗寇白晝流劫爲商旅梗信卽條其  
事于撫按復其舊民賴以寧戊戌代管提學道己亥  
入賀 聖節歸監鄉試性學一策出其手筆有道士  
以妖術憑愚民武奪于通達官司使人攝之莫敢近  
獨信使呼之道士作術如初禁不復驗遂置之法十  
月陞貴州提學副使赴任作聖諭衍訓以寓約束置  
陽明先生祠祭田若干畝奏開普定等十四衛改湖

廣清派等五衛生鄉試附於貴州增其解額舊多以  
險遠不能達湖省自是便之科目日盛城中有黠民  
易棊等投入土酋司中撥置爲不法巡按趙方崖訪  
捕之土酋烏合其衆止城外演武場聲言欲爲變居  
民惶懼奔避撫院謂當招撫之信正色曰寧亂而斃  
我撫不可行也卽遣人持牌以法諭之土酋舉手曰  
若得蔣公處分敢不聽命遂戢衆而歸趙薦于朝謂  
當畀以宮輔成均之任不報癸卯病亟懇歸適督府  
檄取川貴兩司賢能官各一員赴辰沅議邊事撫臺  
劉委信以七月抵貴州御史劾奏信擅離職守遂劾

旨回籍聞報束裝以正學書院記未脫藁遲二日乃  
行劉見之歎曰先生方作文字耶可謂真道學矣去  
之日貴人士皆號泣持輿不忍別信留詩勗之甲辰  
年六十二聞甘泉遊南嶽往從之一切家事不問丁  
未冬奉恩例冠帶閑住己酉春始歸十月卜築精舍  
於桃花岡學徒大集乃作訓規以示之遠方來者卽  
以精舍田所入廩之惟四孟祀祖考一歸城餘日惟  
端坐慎獨中心堂大觀樓與諸生究極微言或臨池  
或陟阜席地坐命諸生歌詩一二首信時自詠乾坤  
二卦文孟子牛山之木生我所欲數章以寓警發進



修游息各有節度已未十一月感痰疾門人還侍孜  
孜屬以進學此外一無語有勸以服藥者荅曰古聖  
賢如孔子七十三明道五十四晦菴七十吾德不逮  
而壽過之俟命足矣更何藥爲疾近殆而神氣爽然  
談笑自若未屬續前二日作詩二首曰歸住青山十  
六年歌遊多在萬桃間萬桃如我浮雲耳請借西風  
吹上天又曰吾儒傳性卽傳禪豈向風塵滯此身分  
付萬桃岡上月要須今夜一齊明十二月庚子漏下  
四鼓瞑目端坐而逝時年七十七學者稱之曰正學  
先生

楊英

楊英武陵人初襲陞萬全都司都指揮僉事尋充獨石右叅將轉協守寧夏副總兵會慶府寘鐠叛遣其黨撤黃河渡船英方以警出屯楊顯堡遂率將士奪之不克走靈州發延綏官軍一千五百人隸焉未幾遊擊將軍仇鉞謀執寘鐠英密約爲內應及平其部下斬獲功最多乃實授都督僉事掛平蠻將軍印鎮守湖廣地方卒賜祭葬如例

補遺

冷謙

冷謙字啓敬武陵人號龍陽子初與邢臺劉秉忠從沙門海雲遊無書不讀尤邃于易及邵氏經世天文地理律曆象伎皆能曲盡其妙至國初已百餘歲矣綠髮童顏如方壯時飄飄然有塵外之趣避遊金陵以方藥濟人取效如神高祖聞其善音律召爲太常協律郎謙承命考正宗廟雅樂音律及鐘磬等器并樂舞之制稱旨一日至便殿上曰汝善遁卽此處能否謙曰得一小罍亦可遁也命與之謙以足漸沒其中呼冷謙輒應及視之空罍耳命碎之左右執碎罍片片皆應自是遂不復見下詔命所在

物色之竟不得後有人見謙于武夷山中云

石瑗

石瑗常德府武陵人祖廷河嘗主家訓約子孫同爨  
傳至瑗家益蕃衍人無間言孫偉鼎益守其訓惇尚  
禮讓知府陸瑯屢造其廬大書十世同居遺之當道  
以聞命有司表之復其家